

KULTURNA I JAVNA DJELATNOST MEDRESE U ŠKOLSKOJ 2024/2025. GODINI

Početak nove školske 2024/25. godine

Nova školska 2024/25. godina u Behram-begovoj medresi počinje u ponedjeljak 2. septembra ove godine. Upis učenika 1-3. razreda u školu i učenički dom obaviti će se dan ranije, u nedjelju 1. septembra. Svi učenici su obavezni tada da dođu i da se smjeste u svoje sobe, a prema rasporedu koji će im biti saopćen. Upis traje u periodu 10-12 sati i vršiti će se u učionicama odjeljenja u koja su raspoređeni učenici. Pojedinačni roditeljski sastanci odjeljenja će se održati isti dan nakon upisa, sa početkom u 12:05 sati. Zajednički roditeljski sastanak za sve roditelje će se održati nakon podne namaza u džamiji Behram-begove medrese.

Za maturante upis će biti organizovan nakon povratka sa maturske ekskurzije.

Obilježen Dan škole

Dan Behram-begove medrese (šesti oktobar) svečanim programom je obilježen u srijedu 9.10.2024. godine.

U svim odjeljenjima je održan čas odjeljenske zajednice, na kojem se govorilo o našoj školi i njenoj historiji.

Svečani program koji je izveden bio je raznovrstan, a izveli su ga članovi hora i orkestra naše škole, te članovi recitatorske sekcije. Prisutnima se obratio direktor Behram-begove dr. Ahmed Hatunić. On je svima zaželio sretan Dan škole, čestitao je dobitnicima ovogodišnjih priznanja i najboljim učenicima, sportistima, pobjednicima literarnog konkursa. Podsjetio je na važnost obilježavanja ovakvih datuma. Istakao je da godišnjice obilježavamo, jer želimo ukazati na kontinuitet znanja u ovom dijelu Bosne i Hercegovine. Naglasio je da se vrijedi boriti i zalagati na putu znanja, jer bez toga nema uspjeha.

I ove godine dodijeljena su priznanja dugogodišnjim uposlenicima Medrese. Ovogodišnje priznanje iz reda profesora dobila je profesorica arapskog i turskog jezika u našoj školi Mejra Numanović, a iz reda tehničkog osoblja priznanja su dobili Fetija Užičanin i Hava Smajlović.

Proglašeni su najbolji učenici u prošloj školskoj godini: Muharem Gibić Ia, Hamza Osmanović Ib, Esmā Ahmetović Ic, Anisa Fatić Id, Ensar Hamidović IIa, Nail Salkanović IIb, Lamija Baćevac IIc, Esmā Rahmanović IID, Ejub Hodžić IIIa, Harun Karić IIIb, Lejla Baturić IIIc i Medina Hatunić IIId.

Učenici koji su uprotekloj školskoj godini ostvarili najveće pojedinačne uspjehe na takmičenjima su: Husein Jašić, Lejla Baturić, Esmā Agić, Ensar Hamidović, Hamza Osmanović, Emina Husić, Amel Islamović i Fatima Huskanović.

Proglašena su najbolja odjeljenja: prvo mjesto zauzeo je IIIc, drugo mjesto pripalo je IIId i treće mjesto zauzeo je Id. Dok je odjeljenje sa najmanje izostanaka bilo IIc.

Za najuspješnijeg sportistu proglašen je Rijad Muratovića, a za najuspješniju sportiskinju Halima Šljivić.

Povodom Dana škole raspisan je i literarni konkurs na temu: Zlo dobrim uzvratu pa će ti dušmanin tvoj odjednom prisni prijatelj postati. Prvo mjesto osvojila je Medina Hatunić IVd, drugo mjesto dijele Nahla Peštalić IID i Elnur Mahmutbegović Ib, a treće mjesto dijele Armin Taletović IIIb i Dalila Omić IID.

Za najčitaoca proglašena je Amina Delić IVc.

Hemičari i biolozi posjetili Visoko i Sarajevo

U utorak 8. 10. 2024. godine učenici koji pohađaju izbornu nastavu iz predmeta biologija i hemija bili su na terenskoj nastavi. Ovom prilikom obišli su preduzeće Vispak d. d. Visoko, koje se bavi proizvodnjom prehrambenih proizvoda. U ovoj firmi upoznali su sa procesom proizvodnje kafe, supa i začina. Isti dan posjetili su i dva lokaliteta u Sarajevu, Vrelo Bosne i Botanički vrt Zemaljskog muzeja. U Parku prirode Vrelo Bosne učenici su praktično uradili mjerenje indeksa biodiverziteta na dvije površine. Na ovom području mogli su jasno vidjeti bogatstvo i raznolikost prirodnih ljepota Bosne i Hercegovine.

U botaničkom vrtu Zemaljskog muzeja učenici su praktično uradili biosistematiku osnovnih vrsta biljaka koje se nalaze na ovom lokalitetu. Terenska nastava iz predmeta biologije i hemije je bila izuzetno zanimljiva i korisna. Učenici su na praktičnim primjerima imali mogućnost da primijene stečeno znanje.

Delegacija iz Sjeverne Makedonije posjetila Medresu

U petak 11.10.2024. godine Behram-begovu medresu su posjetili profesori i imami iz Sjeverne Makedonije. Delegaciju Medrese Isa-beg iz Skoplja predvodio je profesor Blendi Imeri. Sa njim su bili profesori Gzim Sulejmani, Arsim Iseni i Selaidi Ramadani. Na prijemu kod direktora Behram-begove medrese dr. Ahmeda Hatunića razgovarali su o obrazovnom sistemu u Bosni i Hercegovini, o Islamskoj zajednici BiH, te o nastavnom planu naše škole. Nakon razgovora obišli su kompleks Behram-begove medrese.

Ova posjeta je iskorištena za uspostavljanje saradnje između dvije škole.

Dan vakifa Behram-begove medrese

Tradicionalni program posvećen vakifima naše škole održan je u subotu 12.10.2024. godine. Program su izveli članovi hora i orkestra, a prigodne odlomke o važnosti udjeljivanja su čitali članovi recitatorske sekcije.

Vakufname je uručio direktor Behram-begove medrese dr. Ahmed Hatunić i obratio se prisutnima. On je naglasio da su svi profesori vakifi i da želimo pokazati svojim primjerom važnost udjeljivanja, a dosta vakifa su i alumnisti naše škole. On se osvrnuo i na uspjehe Medrese i rekao da je čak dvanaest takmičara na nivou kantona zauzelo neko od prva tri mjesta u prošloj školskoj godini. Također je podsjetio na iznenadnu smrt Imrana Muhamedbegovića, učenika drugog razreda naše škole, čiju ušteđevinu su uvakufili njegovi roditelji za izgradnju nove zgrade Behram-begove medrese.

Programu je prisustvovao i muftija tuzlanski Vahid-ef. Fazlović. On je u svom obraćanju istakao da su muslimani ovog vremena dobročinitelji, da su ljudi ibadeta, naklonjeni su dobru, šire ga i preporučuju. Podsjetio je da se gradi novi objekat koji će osigurati neophodan prostor za rad i djelovanje škole.

Ovogodišnji vakifi su i sljedeće generacije Behram-begove medrese: 275, 332, 336, 340, 350, 334, 335, i 338 generacija.

Ovogodišnjoj manifestaciji je prisustvovao veliki broj vakifa koji su i ranijih godina uvakufili velika novčana sredstva za izgradnju novog objekta koji se gradi u kompleksu Medrese.

Profesori i učenici u humanitarnoj akciji za Donju Jablanicu

Nakon razornih poplava koje su zadesile jedan dio naše zemlje, profesori i učenici Behram-begove medrese pridružili su se humanitarnoj akciji u kojoj je prikupljeno 8.100 KM. Dio ovih sredstava je uplaćen za akciju koju je pokrenuo Međunarodni forum solidarnosti Emmaus, a koju je podržalo Ministarstvo obrazovanja i nauke Tuzlanskog kantona, a jedan dio sredstava je uplaćen u fond u kojem su učestvovala medrese iz Bosne i Hercegovine, a koji je također usmjeren za pomoć poplavljenim područjima. Ostatak novca je uručen džematu Donja Jablanica u kojem je imam alumnista Behram-begove medrese Semir-ef. Jahić.

Nagrada ekskurzija IVc

U petak 18.10.2024. godine učenice četvrtog razreda u pratnji svoje razrednice i odgajateljice posjetile su bosansku krajinu. Zaustavile su se u Kamičanima, gdje su posjetile Memorijalni centar posvećen nevino ubijenim civilima Prijedora i doline Sane. Ovdje su prisustvovala i historijskom času o periodu Agresije na Bosnu i Hercegovinu i progonu Bošnjaka sa ovog kraja, logorima Keraterm, Trnopolje i Omarska. Proučile su fatihu za 3176 ubijenih Bošnjaka, gdje je najmlađa žrtva imala svega četiri godine. Nakon Kamičana uputile su se ka Ostrožcu. Posjetile su ovu prelijepu tvrđavu i dvorac, koji se uzdiže nad kanjonom Une i čije se postojanje veže za srednjovjekovnu bosansku državu. Uslijedio je dolazak u Cazin i obilazak centra grada. A nakon toga su posjetile grad na krajnjem sjeverozapadu Bosne, Veliku Kladušu. Ova posjeta je iskorištena za obilazak poznatog Starog grada, doma Muje Hrnjice, koji je opjevan u epskim pjesmama. Na tvrđavi su dobile dosta informacija od domaćina i glavnog imama Medžlisa Islamske zajednice Velika Kladuša Ismeta Mustedanagića. On se osvrnuo na prošlost ovog kraja, ali i na poznate junake braću Hrnjica, koji su vladali ovim krajem i tvrđavom braneći ovaj dio Bosne od napada iz Hrvatske. Također se osvrnuo i na težak period u ratnim godinama kada su Bošnjaci ratovali jedni protiv drugih. Bio je ovo izuzetan historijski čas na kojem su učenice mogle dobiti dosta zanimljivih informacija. U subotu 19.10.2024. godine posjetile su Bihać. Ovom priikom obišle su centar grada, staru džamiju Fethiju i prošetale su pored prelijepa rijeke Une.

One su nagrađene ovom ekskurzijom, jer su proglašene najboljim odjeljenjem u učenju u školskoj 2023/24. godini.

Susret sa reisul-ulemom

Behram-begovu medresu je u srijedu 23.10.2024. godine posjetio reisul-ulema Islamske zajednice u Bosni i Hercegovini Husein-ef. Kavazović. Ovom prilikom se susreo sa profesorima naše škole. Istakao je koliku važnost ima postojanje Behram-begove medrese za ovaj dio Bosne. Kazao je da prolazimo kroz teška vremena i da

u ratu i u miru nosimo teške terete. Najveći doprinos ummetu naša zajednica će dati ako se budemo usavršavali, svako u svojoj oblasti. Moramo biti sposobni da se sami o sebi pobrinemo, naglasio je reisul-ulema Kavazović.

Profesorima su se obratili i direktor Behram-begove medrese dr. Ahmed Hatunić i muftija tuzlanski Vahid-ef. Fazlović. Direktor Hatunić je predstavio dosadašnje uspjehe Behram-begove medrese, kao i broj profesora, učenika i odjeljenja. Muftija tuzlanski Vahid-ef. Fazlović istakao je da je djelovanje svih institucija u Islamskoj zajednici uspješno zahvaljujući dobroj atmosferi u zajednici.,, Medresa mora biti savremena škola, ali se tradicija mora čuvati.“ Naglasio je muftija Fazlović na kraju svog obraćanja.

Sjećanje na život i djelo Osmana-ef. Kavazovića

U prepunom amfiteatru Behram-begove medrese u srijedu 23.10.2024. godine održan je program posvećen Osmanu-ef. Kavazoviću. O njemu su govorili njegov brat reis-ul ulema Husein-ef. Kavazović, hafiz dr. Elvir Duranović, dr. Šefko Sulejmanović, muftija tuzlanski Vahid-ef. Fazlović, vojni muftija Nesib-ef. Hadžić, Hadis-ef. Pašalić i profesor Mustafa Spahić. Moderator je bio Sevret Mehmedćehajić.

Reis-ul ulema Husein-ef. Kavazović u emotivnom govoru pri-sjetio se svog najstarijeg brata, koji je nakon smrti oca preuzeo ulogu nekoga ko se brinuo o porodici. Reis Kavazović je kazao da se uvijek mogao osloniti na njega i da je sve važne odluke u životu donosio u razgovoru sa njim.

Referat o njemu kao hroničaru, historičaru i etnologu je izložio dr. Šefko Sulejmanović. Osman-ef. Kavazović je napisao djela Azizi-ja i Begova džamiji u Brezovom Polju i Drugi korpus slobodi pjeva.

Dr. Elvir Duranović je govorio o istraživačkom radu Osmana-ef. Kavazovića na polju kulturne historije Bošnjaka sjeveroistočne Bosne. Istakao je da je on napisao devetnaest naučno-istraživačkih radova, koji su objavljeni u poznatim publikacijama. Napisao je 112 priloga u Preporodu i šest zasebnih publikacija.

Muftija tuzlanski Vahid-ef. Fazlović je kazao da je Osman-ef. Kavazović bio privržen ljudima, njegova izravna riječ i ljudskost na poseban način se doživljavala.

Programu posvećenom životu i djelu Osmana-ef. Kavazovića prisustvovao je direktor Behram-begove medrese dr. Ahmed Hatunić, porodica, muftija banjalučki Ismail-ef. Smajlović, vojni imami, brojni prijatelji i džematlije iz Brezovog Polja.

Osman-ef. Kavazović je rođen 29. marta 1953. godine u Jelovče Selu kod Gradačca. Nakon školovanja u Gazi Husrev-begovoj medresi najduže je obavljao imamsku dužnost u Brezovom Polju kod Brčkog, gdje ga je zatekla Agresija na Bosnu i Hercegovinu. Bio je u logoru Luka kod Brčkog i Batkovići. Nakon izlaska iz logora priključio se u redove Armije Republike Bosne i Hercegovine. Naredbom Štaba vrhovne komande Armije Republike Bosne i Hercegovine odlikovan je najvećim vojnim priznanjem Zlatni ljiljan. Radni vijek je završio u činu majora na poslovima vojnog imama Oružanih snaga Bosne i Hercegovine. Na Ahiret je preselio 22.8.2023. godine, a dženaza je klanjana u rodnom Jelovče Selu.

Iz štampe izašao novi broj Misaka

U četvrtak 24.10.2024. godine iz štampe je izašao 111. broj školskog lista Misak. Ovaj broj sadrži dosta zanimljivih tema. Urađen je intervju sa fulbrajtvocem Aidanom Garagićem, koji je u prošloj školskoj godini boravio u našoj školi. Teme koje su obrađene u ovom broju su Ukrasi ahlaka, Alumnisti, Osobine pravovjernih, Velikani književnosti, Nacionalni spomenici, Reportaže, Izlog, Umjetnost, Poznati u islamu, Preporuka, Poezija, Zanimljivosti i Vremeplov.

Druženje sa srednjošolkama iz Srebrenika

Već nekoliko godina postoji saradnja Behram-begove medrese sa Mješovitom srednjom školom iz Srebrenika. Tako je bilo i u srijedu 30.10.2024. godine kada nas je posjetila grupa učenica iz ove škole sa svojom profesoricom engleskog jezika Amelom Nurikić. Bila je ovo prilika za druženje, na kojem su se uz učenje ilahija i

sevdalinki učenice družile, razgovarale i razmjenjivale ideje. Održan je i kratki kviz, nakon kojeg su gošće dobile i poklone. Druženje je nastavljeno u sali za tjelesni odgoj gdje su ekipe dvije škole odmjerile snagu u odbojci. Gošće su ovaj put odnijele pobjedu.

Uzvratna posjeta naše škole planirana je za drugo polugodište.

Učenici iz Visokog na razmjeni u Tuzli

U periodu od 03.11. do 08.11.2024. godine u našoj medresi je boravila grupa učenika i učenica iz Medrese Osman-ef. Redžović iz Visokog. Učenici su u prijedpodnevnim satima prisustvovali nastavi, a u poslijepodnevnim su obilazili znamenitosti Tuzlanskog kantona i družili se sa svojim vršnjacima. U ponedjeljak 04.11.2024. godine bili su na prijemu kod direktora Behram-behram begove medrese dr. Ahmeda Hatunića. U poslijepodnevnim satima upoznali se sa historijskim znamenitostima našeg grada. Obišli su mjesto gdje je bila stara medresa, biblioteku Behram-beg gdje su naučili dosta zanimljivih činjenica od bibliotekara Seada Husića. Nakon toga su posjetili Muzej 25.maj, zatim su prošetali kroz Gradski park gdje su mogli vidjeti spomenik kralju Tvrtku I Kotromaniću. U Turalibegovoj džamiji dočekaio ih je imam hafiz Merim-ef. Đulović. On je kazivao o osnivaču Tuzle, Turali-begu u njegovim vakufima.

U utorak 5.11.2024. godine posjetili su Memorijalni centar Gornja Kalesija, Memići, a nakon toga su se uputili prema Kušlatu. Tu su klanjali podne namaza, i održan je historijski čas o ovoj prelijepoj džamiji. U povratku su svratili na Divič, gdje su proveli ostatak dana na obali prelijepog jezera.

U srijedu 06.11.2024. godine družili su se sa našim učenicima u kuglani, a nakon toga su u sali realizovane sportske aktivnosti. U četvrtak 07.11.2024. godine posjetili su Stari grad Srebrenik i Gradačac. Ovom prilikom su obišli kulu Husein-kapetana Gradaševića, centar grada, Banju Ilidžu, Reuf-begovu džamiju i oklopni voz.

U petak 07.11.2024. godine nakon nastave i oproštaja od naših učenika vratili su se u Visoko. Bila je ovo izuzetna prilika za učenje o tradiciji i kulturi ovog dijela naše domovine i prilika za sklapanje cjeloživotnih prijateljstava.

Ovo je uzvratna posjeta Medrese iz Visokog, jer je u ovoj sedmici grupa naših učenika i učenica boravila u Medresi Osman-ef. Redžović. I oni su prisustvovali nastavi, a u slobodno vrijeme su obišli Sarajevo, tunel i park Ravne, Franjevačku klasičnu gimnaziju, Tabhansku džamiju i postrojenje mesne industrije Semić.

Ova posjeta je realizovana u okviru programa Partnerstvo medresa.

Održana radionica o pisanju vijesti; Prvi nacrt historije ili njen falsifikat

U amfiteatru Behram-begove medrese u utorak 12.11.2024. godine članovima novinarske sekcije predavanje i radionicu na temu Vijest, prvi nacrt historije ili njen falsifikat, održala je doc.dr. Amela Delić Aščić. Ona se u svom izlaganju osvrnula na pisanje vijesti i na pet pitanja na koja treba odgovoriti kada se piše ovaj novinarski žanr. U drugom dijelu održana je radionica, a zadatak za učenike je bio da napišu vijest na osnovu predloženih informacija.

Saradnja profesorice doc.dr. Amele Delić Aščić sa Odsjeka Žurnalistika Filozofskog fakulteta u Tuzli i novinarske sekcije Behram-begove medrese traje duže vrijeme. Bila je ovo prilika da se novi članovi upoznaju sa osnovama novinarstva i da sljedeći put kada pročitaju neku vijest prepoznaju da li ona ispunjava sve kriterije.

Obilježen Dan državnosti Bosne i Hercegovine

U ponedjeljak 18.11.2024. godine u prepunoj sali Behram-begove medrese izveden je svečani program Da ti se divi svijet, čime je obilježen Dan državnosti Bosne i Hercegovine.

Program je bio raznolik, a izveli su ga članovi dramskog studija i hor Behram-begove medrese. Na programu su izvedeni odlomci iz dvije drame, Veliki vezir Derviša Sušića i Kulin ban Zlatka Topčića. Probranim citatima o Bosni i Hercegovini poznatih bosanskih književnika i historijskih ličnosti, članovi recitatorske sekcije su podsjetili na ljepote naše domovine.

Predavač je bio dekan Pravnog fakulteta Univerziteta u Tuzli dr. Amir Karić. On se u svom govoru prisjetio značajnih datuma

i osvrnuo na slavnu prošlost naše zemlje. Rekao je da nije lahko živjeti u Bosni i da svako od nas mora biti jak i sposoban, jer jedino tako možemo osigurati sebi i našem potomstvu sigurnu budućnost i da svako od nas treba izrasti u zaštitnika svog naroda. Također je istakao da mladi moraju imati snove i viziju gdje sebe vide u budućnosti.

Maturanti posjetili kasarnu "Dubrave"

Učenici četvrtog razreda Behram-begove medrese su u uto-rak 26.11.2024. godine posjetili kasarnu i aerodrom „Dubrave“ u Živinicama. Prisustvovali su manifestaciji Dan otvorenih vrata, a povodom obilježavanja 19. godišnjice Oružanih snaga Bosne i Hercegovine. Učenici su nakon svečanog programa i postrojavanja komandi i jedinica, obišli eksponate sa naoružanjem i teškom artiljerijom. Također su mogli dobiti informacije o prijavljivanju u Oružane snage Bosne i Hercegovine, a na posebnom štandu su bili i pokloni, namijenjeni osnovnoškolcima i srednjoškolcima, koji su sa svojim učiteljima i nastavnicima prisustvovali manifestaciji.

Program je održan pod pokroviteljstvom Ministarstva odbrane, zajedničkog štaba Oružanih snaga i operativnih komandi Oružanih snaga 5. pješadijske brigade. Dan Oružanih snaga Bosne i Hercegovine se obilježava 1. decembra.

Novi broj Misaka izašao iz štampe

U petak 13.12.2024. godine iz štampe je izašao 112. broj Misaka. Tema ovog broja je Identitet. Podsjećajući na obilježavanje Prvog bošnjačkog sabora prisjećamo se značajnih historijskih ličnosti i datuma u našoj prošlosti. U ovaj broj Misaka uvršten je čuveni govor poznatog književnika Alije Isakovića sa ovog Sabora. Obradena je i tema Kupujmo domaće, zatim Možemo li bez interneta. Posebna rubrika je posvećena obilježavanju stotinu godina od genocida u Šahovićima. Također je napisan osvrt na obilježavanje 250 godina od prvog zapisa Hasanaginice. Tu je i reportaža o maturskoj ekskurziji u Tursku, zatim rubrike Drugi o Misaku, Psihologija sreće, Posljednja objava, Tehnologija, Sport, Učenici na razmjeni, Izlog, Zanimljivosti.

Humanitarci u posjeti Pomozi.ba

Članovi humanitarne sekcije i kreativnih radova su u srijedu 18.12.2024. godine boravili u Sarajevu. Posjetili su Udruženje Pomozi.ba, koje već dvanaest godina pomaže ljudima širom Bosne i Hercegovine. Dočekale su ih portparol Udruženja Saliha Rokša i Aida Halilagić, koje su predstavile rad ove humanitarne organizacije. Posjeta je iskorištena i za doniranje novčanih sredstava u iznosu od 1.200 KM, koje su članovi sekcija prikupili prodajom kolača na ženskom mevludu. Bila je ovo prilika da učenici saznaju više informacija o aktivnostima ove humanitarne organizacije, kako bi se još više u narednom periodu posvetili pomaganju ugroženim kategorijama našeg društva.

Udruženje Pomozi.ba je neprofitna humanitarna organizacija koja svojim djelovanjem pomaže ugroženim ljudima na području Bosne i Hercegovine. Timovi ove humanitarne organizacije pružaju pomoć povratnicima, starim, iznemoglim licima, samohranim majkama, porodicama bez stalnih primanja, djeci bez roditelja, osobama sa invaliditetom, oboljelim, migrantima. Od svog osnivanja 2012. godine do danas Udruženje Pomozi.ba pomoglo je oko 700.000 osoba kroz različite projekte i humanitarne akcije.

Jedna srebrna i pet bronzanih plaketa za Medresu

Svečanost dodjele plaketa najboljim učenicima sa područja Tuzlanskog kantona za školsku 2023/2024. godinu, koje dodjeljuje Ministarstvo obrazovanja i nauke Tuzlanskog kantona i Pedagoški zavod TK održana je u utorak 24.12.2024. godine u Bosanskom kulturnom centru u Tuzli.

Srebrnu plaketu je dobila Lejla Baturić za osvojeno prvo mjesto na federalnom takmičenju iz fizike. Bronzane plakete su dobili sljedeći učenici Behram-begove medrese: Husein Jašić za osvojeno prvo mjesto na kantonalnom takmičenju iz matematike i fizike, Esmā Agić za osvojeno prvo mjesto na kantonalnom takmičenju iz biologije. Bronzanu plaketu za osvojeno prvo mjesto dobio je tim CIVITAS. Za osvojeno prvo mjesto u disciplini 4×100 metara brozanu plaketu su dobili Selver Pašić, Rijad Muratović i Muhamed

Hujdur. Rijad Muratović je dobio bronzanu plaketu za osvojeno prvo mjesto u disciplini trčanje na 100 metara.

Behram-begova medresa ponovo među najboljim školama Tuzlanskog kantona

Objavljeni su rezultati vrednovanja srednjih škola na području Tuzlanskog kantona za školsku 2023/24. godinu. Behram-begova medresa je zauzela drugo mjesto među gimnazijama i tako nastavila lijepu tradiciju uspjeha u radu i plasmana među prvim školama na području kantona u svim godinama u kojima se vrednovanje provodi.

Vrednovanje srednjih škola vršio je Pedagoški zavod Tuzlanskog kantona.

Ponosni na njihov rad, u penziju ispraćeni Halil Mehanović i Azra Fazlović

U utorak 31. decembra, posljednjega dana kalendarske 2024. godine, u Behram-begovoj medresi je održana svečana sjednica Nastavničkog vijeća.

Povod za svečano ozračje na sjednici je ispraćaj u penziju profesora Halila Mehanovića i profesorice Azre Fazlović.

Nakon što su se s njima proteklih dana oprostili učenici i alumnisti Medrese, zadnjega njihovog radnog dana u Medresi učinili su to i njihovi kolege iz Nastavničkog vijeća.

Direktor Behram-begove medrese dr. Ahmed Hatunić zahvalio se za sav doprinos koji su njih dvoje dali u proteklim godinama. Naglasio je da su oni u Medresu došli ratne 1994. godine i da su od tada do danas predano radili svoj posao podučavanja učenika u školi.

Sjednici je prisustvovao i muftija tuzlanski dr. Vahid-ef. Fazlović, koji je istakao da su ovo posebni povodi i da su njih dvoje Allahovom voljom ponijeli bajrak Medrese. Mnoge generacije učenika su završile našu Medresu i najveći dio njih je ponosan na to iskustvo. Oni su bili predani dok su radili. O profesoru Halilu Mehanoviću je rekao da je on uvijek radio više i bio je inicijativan. Kao poznavalac

arapskog jezika, on je među najboljim kod našeg naroda. O profesorici Azri Fazlović je rekao da se o njoj može puno govoriti, a najviše o njenoj smirenosti u obavljanju poslova profesorice.

Obratio se i profesor Halil Mehanović koji je rekao da je uvijek gledao da uradi svoj posao na najbolji način. Zahvalan je što je svoj život proveo na ovom poslu.

Profesorica Azra Fazlović je rekla da je zahvalna Bogu što je radila u Medresi. U vrijeme Agresije na domovinu pridružila se školi i uvijek je radila s dubokom sviješću o njenoj važnosti.

Profesori su svome kolegi i kolegini kao uspomenu uručili umjetničke levhe poznate bosanskohercegovačke kaligrafkinje Nermine Vehab Đulović.

Mr. Admir Muratović imenovan za direktora Behram-begove medrese

Svečana sjednica Školskog odbora Behram-begove medrese, povodom preuzimanja dužnosti novog direktora ove škole, održana je u petak, 17. januara 2024. godine.

Na prethodnoj sjednici Školskog odbora, nakon konkursne procedure i dobivene saglasnosti, donesena je konačna odluka o imenovanju mr. Admira Muratovića za novog direktora Behram-begove medrese u mandatnom periodu 2025-2029. On na dužnost stupa 18. januara 2025. godine, po isteku mandata sadašnjem direktoru dr. Ahmedu Hatuniću, koji je imenovan za direktora JU Specijalna biblioteka „Behram-beg“ u Tuzli.

Doktorirao direktor Behram-begove medrese Admir Muratović

Na Filozofskom fakultetu Univerziteta u Tuzli, u ponedjeljak 20.01.2025. godine održana je javna odbrana doktorskog rada direktora Behram-begove medrese mr. Admira Muratovića pod naslovom *Povijesnokontrastivna jezička analiza orijentalizama u Hikmetu (1929-1936) i Hikmetu (1993-2001)*.

Dr. Admir Muratović uspješno je odbranio disertaciju pred Komisijom u sastavu: dr.sc. Sead Nazibegović, vanredni profesor i mentor, predsjednica komisije dr.sc. Amira Turbić-Hadžagić i dr.sc. Marijana Nikolić, vanredna profesorica.

Dr. Admir Muratović je rođen u Skoplju 1982. godine. Behram-begovu medresu je završio u Tuzli 2000. godine. Završio je studij arapskog jezika i književnosti i turskog jezika i književnosti na Odsjeku za orijentalnu filologiju na Filozofskom fakultetu u Sarajevu. Za vrijeme studija više puta je boravio u Egiptu i Turskoj radi specijalizacije arapskog i turskog jezika. Na Filozofskom fakultetu u Tuzli odbranio je magistarski rad na temu *Jezičke karakteristike mevluda hafiza Salih Gaševića* i stekao zvanje magistra humanističkih nauka iz oblasti lingvistike. Prevodilac je i koprevodilac brojnih radova i nekoliko knjiga s turskog i arapskog jezika. Bio je zaposlen u Behram-begovoj medresi kao profesor arapskog jezika, a radio je i u Gimnaziji Ismet Mujezinović, kao profesor turskog jezika. Za direktora JU Specijalne biblioteke Behram-beg u Tuzli imenovan je 2017. godine i na toj funkciji je bio do izbora za mjesto direktora Medrese. Oženjen je i otac dvoje djece.

Novinari posjetili Hayat TV

U četvrtak 23.01.2025. godine članovi žurnalističke sekcije Behram-begove medrese boravili su u Sarajevu. Posjetu našoj prijestolnici iskoristili su za obilazak Hayat TV. Domaćin je bio producent Hayatovaca Emir Ovčina. On je pričao o produkciji, režiji, montaži i načinu pripreme emisija. Ovom prilikom pogledali su i najveći studio ove poznate bosanskohercegovačke medijske kuće, u kojoj su u toku pripreme za snimanje ramazanskog programa, zatim studio u kojem se snimaju informativne emisije, i emisije zabavnog karaktera. Učenici su imali priliku da se upoznaju sa poznatim licima ove medijske kuće, da razgovaraju i da se fotografišu sa njima. Bila je ovo dobra prilika da saznaju na koji način se pripremaju emisije i koja su zanimanja tražena za rad na televiziji.

Hayat TV je privatna televizija, koja je osnovana je 1992. godine. Program je emitovan i za vrijeme opsade Sarajeva. Nakon Agresije na Bosnu i Hercegovinu Hayat TV postaje programski komercijalna

televizija. Trenutno ima sedam kanala. Program se emituje putem satelita i IPTV platforme Bosna TV. Specijalni program ove medijske kuće je Hayat TV SAT, koji se emituje putem satelita za gledaoce u Evropi, Australiji, Kanadi, SAD-a i Novom Zelandu.

Programom "Moj hidžab, moj izbor" obilježen Svjetski dan hidžaba

U Behram-begovoj medresi je u četvrtak 30.1.2025. godine povodom Svjetskog dana hidžaba izveden program Moj hidžab, moj izbor. Program su pripremile i izvele učenice Behram-begove medrese.

Program je bio raznovrstan i sastojao se od učenja Kur'ana, interpretacije ilahija i sevdalinki, kviza, modne revije. Predavač je bila hafiza Hidajeta Mahalbašić.

Svjetski dan hidžaba se obilježava širom svijeta, a ustanovljen je na prijedlog Nazme Khan iz New Yorka, koja je željela podstaknuti nemuslimanke da stave hidžab na jedan dan i dožive to iskustvo. Akcija je organizovana u cilju otklanjanja barijera i radi boljeg razumijevanja i rušenja predrasuda, koje se vežu za hidžab.

Magistrirao profesor Ali Hasanović

U petak 31.1.2025. godine na Filozofskom fakultetu Univerziteta u Tuzli magistrirao je Ali Hasanović, profesor bosanskog jezika i književnosti u Behram-begovoj medresi. Tema njegovog magistarskog rada je *Tipološke veze divanskog pjesništva Bošnjaka i poezije hrvatskog baroka: komparativna analiza*.

Rad je odbranio pred komisijom u sastavu: mentor i član komisije dr.sc. Vedad Spahić, dr.sc. Mevlida Đuvic, predsjednik komisije i dr.sc. Melinda Botalić.

U njegovom radu predstavljen je komparativni odnos divanske književnosti Bošnjaka i hrvatskog književnog baroka. U teorijskom dijelu objašnjene su poetike i jedne i druge pjesničke tradicije, koje su nastajale u približno isto vrijeme. Ali, u sasvim drugačijem kulturno-civilizacijskom kontekstu. Konstatovano je da na primjeru odnosa divanske književnosti Bošnjaka i hrvatskog književnog

baroka nije bilo direktnih i kontaktnih dodira, već je njihov veoma sličan pjesnički imaginarij rezultat psihološke uvjetovanosti i duha vremena.

Mr. Ali Hasanović rođen je u Mostaru 18.10.1977. godine. Završio je Behram-begovu medresu u Tuzli, a nakon toga upisuje Filozofski fakultet, Odsjek za književnost naroda Bosne i Hercegovine. Nakon završetka fakulteta radi u Behram-begovoj medresi kao profesor bosanskog jezika i književnosti. Od 2018. godine saradnik je na Filozofskom fakultetu u Tuzli, na Odsjeku za Bosanski jezik i književnost kao stručnjak iz prakse. Napisao je nekoliko knjiga poezije i proze, a svoje priče je objavio u časopisima Lica, Odjek i Album. Objavio je više naučnih i stručnih radova. U akademskoj 2018/19. godini upisuje II ciklus studija BH književnost u književnohistorijskom kontekstu na Filozofskom fakultetu Univerziteta u Tuzli. Oženjen je i otac je dvoje djece.

Direktor Uprave za obrazovanje i nauku bio u Medresi

U posjeti Behram-begovoj medresi u srijedu 5.2.2025. godine bili su prof.dr. Dževad Hodžić, direktor Uprave za obrazovanje i nauku Rijaseta Islamske zajednice u Bosni i Hercegovini i muftija tuzlanski Vahid-ef. Fazlović. Ovu posjetu su iskoristili kako bi novom rukovodstvu Behram-begove medrese poželjeli mnogo uspjeha u budućem radu.

Dr. Admir Muratović imenovan je za direktora Behram-begove medrese u januaru ove godine, a hafiz Nedžad Vehabović imenovan je za novog pomoćnika direktora za nastavu.

Posjete Medresi iz Visokog, Sarajeva i Tuzle

U danima 5-7.2.2025. godine u Behram-begovoj medresi su boravili Dženan Rezaković, direktor medrese Osman-ef. Redžović iz Visokog, direktor Gazi Husrev-begove medrese Dževad Pleh, direktor Instituta za religijska i društvena istraživanja iz Tuzle Šefko Sulejmanović i predsjednik MIZ Tuzla dr. Amir Karić i glavni imam hafiz Ahmed Huskanović.

Zajednički povod za njihove odvojene posjete Medresi je stupanje na dužnost novog direktora naše škole Admira Muratovića. Svi gosti su mu čestitali na izboru i imenovanju i zaželjeli puno uspjeha u radu.

Učenici u NASA-inoj misiji

U četvrtak 6.2.2025. godine sedam učenika Behram-begove medrese učestvovalo je prestižnoj NASA-inoj misiji Sally Ride EarthKAM, koja je omogućila da istražuju Zemlju iz perspektive Međunarodne svemirske stanice (ISS). Tokom misije učenici su podnijeli zahtjeve za snimanje satelitskih fotografija odabranih lokacija širom svijeta, postajući tako dio globalnog naučnog projekta, koji inspiriše mlade istraživače i podstiče interes za nauku, tehnologiju, inženjerstvo i matematiku. Učešće u Sally Ride EarthKAM zahtijevalo je prethodnu registraciju i pripremu. Učenici su odabrali određene lokacije na Zemlji koje žele istražiti i poslali su zahtjeve za njihovo snimanje. Nakon obrade podataka, kamera na Međunarodnoj svemirskoj stanici zabilježila je fotografije koje će učenici koristiti za analizu i daljnje istraživanje.

Hafiz Kenan Musić posjetio Medresu

U srijedu 12.2.2025. godine održana je sjednica Nastavničkog vijeća, na kojoj je stručno izlaganje održao dr. Kenan Musić. On se u svom obraćanju osvrnuo na životopis posljednjeg Allahovog Poslanika, i na osobine koje su ga krasile. Govorio je o motivaciji i ustrajnosti, podsjetivši na poslanika Muhammeda a.s. i na njegovu fokusiranost u izvršavanju obaveza.

Dr. Kenan Musić je vanredni profesor na Fakultetu islamskih nauka Univerziteta u Sarajevu. Rukovodilac je Katedre za hadis. Društveno je angažovan i aktivan predavač na raznim događajima.

Noć oprosta i milosti

U džamiji Behram-begove medrese u četvrtak 13.2.2025. godine, nakon klanjanja akšam-namazima obilježena je mubarek noć

Lejletul-berat. U prepunoj džamiji program su izveli članovi hora naše škole. Proučen je mevlud, a nakon programa predavanje je održao hafiz Ammar Bašić. On se u nadahnutom govoru obratio učenicima, profesorima i džematlijama, podsjetivši na važnost ove odabrane noći.

Noć Lejletul-berat je petnaesta noć mjeseca šabana. Ova noć se još spominje pod nazivom noć oprosta ili rahmeta i noć sudbine. Ovo je noć dove i molbe Allahu Uzvišenom. Preporučeno je dio noći provesti u ibadetu i skrušeno učiti Kur'an i upućivati dove za sebe, svoju porodicu, narod, domovinu. Noć poput ove je velika prilika da se učini tevba. Prilika je ovo za popravljjanje grešaka. Nakon odabrane noći lijepo je sljedeći dan provesti u postu.

Večer ilahija i kasida

Predramazanska Večer ilahija i kasida održana je u srijedu 19.2.2025. godine u Bosanskom kulturnom centru u Tuzli. U prepunoj sali nastupili su hor Behram-begove medrese, hor Medžlisa islamske zajednice Tuzla Gazi Turali-beg, hafiz Mirsad Mrahorović i Sead Mrahorović. Programu su prisustvovali muftija tuzlanski Vahid-ef. Fazlović, direktor Behram-begove medrese Admir Muratović, glavni imam MIZ Tuzla hafiz Ahmed Huskanović, te brojni gosti iz Tuzle.

Članovi hora Behram-begove medrese izveli su nekoliko ilahija: Tvom resulu, Da je Bosna od dženneta dio, Ya ilahi, Devet heroja. Bila je ovo izuzetna noć u kojoj je publika istinski uživala slušajući prelijepu izvedbu najpoznatijih ilahija i kasida.

Organizatori ovog događaja su Behram-begova medresa u Tuzli i Medžlis islamske zajednice Tuzla uz podršku Muftijstva tuzlanskog.

Iz štampe izašao novi broj Misaka

U četvrtak 20.2.2025. godine iz štampe je izašao 113. broj školskog lista Misak. U ovom broju donosimo vam intervju sa poznatim režiserom dokumentarnih filmova Avdom Huseinovićem. Približava nam se mjesec posta, a u rubrici *Savjeti* donosimo vam neke

smjernice kako da vrijeme u njemu iskoristite na najbolji način. U rubrici *Čuvari Božije riječi* predstavljamo dva nova hafiza. *Naša baština* je rubrika u kojoj smo podsjetili na sevdalinku i na njeno uvrštavanje na UNESCO-vu listu nematerijalne kulturne baštine čovječanstva. Tu su stalne rubrike *Posljednja objava*, *Učenici iz dijaspore*, *Balade*, *Moja umra*, *Sekcije*, *Izlog*, *Vremeplov*.

Održana Konferencija učeničkih listova Medresa i gimnazija

U Behram-begovoj medresi je u petak 21.2.2025. godine održana Konferencija učeničkih listova medresa i gimnazija Islamske zajednice u Bosni i Hercegovini. Na otvaranju konferencije obratio se direktor Behram-begove medrese Admir Muratović, koji je poželio dobrodošlicu gostima. Predavači su bili novinar i publicista Fahrudin Sinanović, koji je pričao o svom novinarskom putu i osnovnim moralnim načelima kojih se novinari trebaju pridržavati u izvještavanju. Drugi predavač je bio profesor informatike u Behram-begovoj medresi Elvedin Kozarević. On je pričao o *Tehničkom uređenju kao alatu za poboljšanje čitalačkog iskustva*. I dr. Amela Delić-Aščić, profesorica sa Odsjeka Žurnalistika, Filozofskog fakulteta Univerziteta u Tuzli. Tema o kojoj je govorila je *Novinarski žanrovi u doba mrežnih medija-gdje je danas vijest?*

Učesnici su ovu priliku iskoristili da predstave svoje školske listove. Trenutno u našim medresama izlaze listovi Zemzem (Gazi Husrev-begova medresa), Mimar (Karadžoz-begova medresa), Nedžm (Elči Ibrahim-pašina medresa), Šahid (Medresa Osman ef. Redžović) i Misak (Behram-begova medresa). Dok u Prvoj bošnjačkoj gimnaziji postoje dva školska lista Vrelo i Limes.

Konferenciji su prisustvovali koordinatori školskih listova sa predstavnicima listova iz Gazi Husrev-begove medrese iz Sarajeva, Medrese Osman ef. Redžović iz Visokog, Karadžoz-begove medrese iz Mostara, Elči Ibrahim-pašine medrese iz Travnika, Medrese Reis Džemaludin-ef. Čaušević iz Cazina, Prve bošnjačke gimnazija iz Sarajeva i Behram-begove medrese iz Tuzle.

Suorganizatori ovog događaja su Uprava za obrazovanje i nauku Rijaseta Islamske zajednice u Bosni i Hercegovini i Behram-begova medresa u Tuzli.

Izložba fotografija Mojoj Bosni

Mladi talenti Behram-begove medrese fotografišući najljepša mjesta u Bosni pokazali su koliko vole svoju domovinu. U proteklom periodu grupa vrijednih i kreativnih učenika Behram-begove medrese je samostalno snimila, obradila, pripremila za postavljanje izložbu fotografija povodom 1. marta, Dana nezavisnosti Bosne i Hercegovine. Marljivo su radili fotografišući nacionalne spomenike, džamije, prirodne ljepote, bosanske kuće, ljude. Kao rezultat njihove predanosti u ponedjeljak 24.2.2025. godine postavljena je izložba Mojoj Bosni. Izložba je postavljena u Medresi i izloženo je 38 fotografija koje oslikavaju živopisne predjele od Sarajeva, Tuzle, Živinica, Srebrenika, Gradačca sve do Bosanske Krupe. Svaki kadar priča posebnu priču o ljepoti naše zemlje. Autori radova su Džejla Nurikić, Marizela Velagić, Medina Bajrektarević, Nejra Siočić i Imran Imamović. Mentorstvo izložbe potpisuje profesor Robert Andrejaš, član Asocijacije za umjetničku fotografiju u Bosni i Hercegovini i voditelj kursa digitalnih medija u Medresi. Koordinator izložbe je Senada Mehmedćehajić.

Izložba fotografija posvećena 30. godišnjici Genocida nad Bošnjacima Srebrenice

Učenici Behram-begove medrese su u proteklom periodu na razne načine obilježili tužnu 30. godišnjicu Genocida u Srebrenici. Jedna od aktivnosti jeste i kreiranje umjetničkih fotografija i postavljanje njihove izložbe.

Na izložbi su svoje radove izložili učenici Imran Imamović, Medina Bajrektarević i Marizela Velagić. U ovome važnom radu mentor im je bio profesor fotografije Robert Andrejaš, a koordinatorica Senada Mehmedćehajić.

Promovisana zbirka "Vrijeme leti, ja sam pilot"

Povodom Međunarodnog dana maternjeg jezika u Behram-begovoj medresi je u ponedjeljak 24.2.2025. godine održana promocija Zbirke literarnih i likovnih radova djece Srebrenice, pod nazivom Vrijeme leti, ja sam pilot, koju je priredila Meliha Herić, profesorica bosanskog jezika i književnosti. Promocija je održana kao dio programa povodom obilježavanja Međunarodnog dana maternjeg jezika, koji se ove godine obilježava pod sloganom Bosanski govorim, na bosanskome razgovaramo. Profesorica Herić je istakla da se jednom narodu ne može oduzeti jezik, sve dok ima jedna osoba koja govori taj jezik. Naglasila je da je važna svjesnost o identitetu i o tome ko smo mi u našoj domovini. Program su priredili učenici i učenice 351. generacije Behram-begove medrese, pod mentorstvom profesorice Nasihe Smajlović. U programu su učestvovali i članovi hora i dramske sekcije naše škole.

Radionicom o nezavisnosti Bosne i Hercegovine

Povodom obilježavanja Dana nezavisnosti Bosne i Hercegovine u ponedjeljak 24.2.2025. godine članovi sekcije Kultura Bosne i Hercegovine organizovali su radionicu.

Učenici su radili na temu Uloga i značaja 1. marta za nezavisnost države Bosne i Hercegovine. Učestvovali su učenici iz Katoličkog školskog centra iz Tuzle, Gimnazije Meša Selimović, Gimnazije Ismet Mujezinović, Medicinske škole i Elektrotehničke škole.

Održan program povodom Dana nezavisnosti Bosne i Hercegovine

Program povodom 1. marta Dana nezavisnosti Bosne i Hercegovine održan je u prepunjoj fiskulturnoj sali Behram-begove medrese u utorak 25. februara 2025. godine. Program se sastojao od izvođenja ilahija i probranih recitacija. U programu su učestvovali članovi hora i recitatorske sekcije naše škole.

Predavač je bio sportista Ermin Jusufović, koji je pričao o svom životu. Zahvaljujući treninzima i upornosti postaje dio zlatnog tima i član reprezentacije Bosne i Hercegovine u sjedećoj odbojci. Proglašavan je dva puta najuspješnijim sportistom Tuzlanskog kantona. Na paraolimpijskim igrama u Parizu osvojio je srebrnu medalju i proglašen je za najboljeg blokera paraolimpijskog turnira.

Ramazanske aktivnosti učenika

U četvrtak 27.2.2025. godine učenici I-IV razreda Behram-begove medrese su upućeni na ramazanske aktivnosti. Oni će za vrijeme ramazana biti na usluzi džematima širom Bosne i Hercegovine i učestvovaće u realizaciji ramazanskih aktivnosti. U školske klupe se vraćaju 2. aprila 2025. godine.

Autobus prijateljstva putovao kroz gradove

U periodu od 10-21.3.2025. godine realizovan je projekat Autobus prijateljstva. U ovih dvanaest dana učenici i profesori su putovali i posjećivali gradove na području Muftiluka tuzlanskog. Učenici su sa svojim profesorima posjetili džemate, iftarili se i nakon klanjanja akšam-namaza u svim mjestima koja su zijaretili izveli su program koji je svojim sadržajem podsjetio na blagodati mjeseca ramazana. Na kraju programa prigodnim predavanjima obratili su se profesori Behram-begove medrese, koji su bili u pratnji učenici-ma tokom svake posjete.

Profesori koji su održali predavanja su: Jusufović Kemal, Hašarić Smail, Mehanović Rešid, hfz. Kadrić Muamer, Alić Nedim, hfz. Kapo Abdullah, Mehić Bekir, Memić Idriz, Šestan Rijad, hfz. Imamović Asmir, hfz. Vehabović Nedžad, Šabić Bekir, Čandić Mehmedalija, hfz. Hodžić Amir i hfz. Mirnes Spahić. Posjetili su Brčko, Bijeljino, Zvornik, Teočak, Orašje, Bratunac, Srebrenik, Modriču, Čelić, Tuzlu, Gračanicu, Odžak, Janju, Živinice, Kladanj, Gradačac, Banoviće, Puračić, Bosanski Šamac, Vlasenicu, Srebrenicu, Kalesiju.

Ovaj projekat je zamišljen kako bi se učenici Medrese i mladi Muftijstva tuzlanskog tokom omladinskih iftara upoznavali, družili i razvijali posebne veze, nadahnute mjesecom ramazanom.

Lav bosanski

Promocija knjige Lav bosanski, koju su priredile Fahira, Emina i Sidika Čengić održana je u četvrtak 3.4.2025. godine u Behram-begovoj medresi u Tuzli. Supruga rahmetli Hasana Čengića prof. dr. Fahira Čengić pričala je o svom suprugu, prisjećajući se riječi i poruka koje su ga vodile kroz život. Također je istakla njegovu posvećenost Islamskoj zajednici, kojoj je u posljednjih sedam godina svog života posvetio najviše vremena. Njegove kćerke Emina i Sidika Čengić govorile su o ocu i svom odrastanju uz njega, prisjećajući se određenih momenata. Izudin Šikalo, urednik ove knjige, istakao je da osjeća veliku odgovornost zbog povjerenja koje mu je ukazala porodica rahmetli Hasana Čengića. Na promociji se obratio i dr. Sead Seljubac. On se prisjetio zajedničkih susreta sa njim dok su bili srednjoškolci. Promociji je prisustvovala i novinarka Almasa Hadžić. Sjetila se prvog razgovora sa njim u ratnoj 1993. godini, kao i kasnijih susreta i njegove spremnosti da pomogne povratnicima u Podrinju. Na kraju promocije obratio se i muftija tuzlanski Vahid-ef. Fazlović. Govorio je o liku i djelu rahmetli Hasana Čengića. Rekao je da ga se sjeća kao izuzetno ozbiljnog, sposobnog i odlučnog, te da mu zbog određenih zasluga pripada status jednog od najzaslužnijih bošnjačkih predvodnika našeg vremena.

Maturanti posjetili IUS

Testiranje za maturante Behram-begove medrese na Internacionalnom univerzitetu u Sarajevu obavljeno je u srijedu 9.4.2025. godine. I ove godine zajedno sa ostalim srednjoškolcima dobili su priliku da osvoje stipendiju na ovom prestižnom Univerzitetu. Domaćini su bili svršeni naše škole koji studiraju na IUS-u Jusuf Mehmedčehajić i Nadia Purdić. Maturanti su odabrali studentske programe koji planiraju upisati (Arhitektura, Genetski inženjering, Engleski jezik i književnost, Softverski inženjering, Menadžment, Vizuelne umjetnosti i grafički dizajn) i pristupili su testiranju. Testiranje je ključni trenutak za one koji se nadaju stipendiji, jer im omogućava pristup značajnoj financijskoj podršci. Osim testiranja dan je bio ispunjen i drugim aktivnostima. Posjetioci su mogli da

obiđu kampus i osjete atmosferu studiranja na IUS-u. Za mnoge je ovo bio dan za donošenje životnih odluka.

Pored kvalitetne nastave IUS se može pohvaliti i prestižnim programom dvojne diplome, realizovanim u saradnji sa tri ugledna univerziteta iz Turske.

Eksperimentima o nauci

U period od 10-14.3.2025. godine obilježen je Evropski dan nauke za mlade (ESDY). Učesnici su pozvani da organizuju i podijele zabavne eksperimente na zadatu temu, kako bi stekli jedinstveno iskustvo učenja. U ovogodišnjem ESDY-u učestvovala su Lamija Rešidović, Amina Okić, Kanita Čvalić, Zulejha Zaimović i Fadila Ikanović. One su izvele i snimile eksperimente na temu *Temperatura*. Svaka učenica je samostalno izvela svoj eksperiment, zabilježila rezultate i pripremila video prezentaciju koja prikazuje proces. Učešće učenica u *Evropskom danu nauke za mlade 2025* omogućilo im je da prodube svoje razumijevanje naučnih principa vezanih za temperaturu, razviju vještine eksperimentisanja i prezentacije, te da se povežu sa širom naučnom zajednicom i sa mladima širom Evrope.

Uspješno realizovana studijska razmjena učenika

U periodu 9-21.4.2025. godine u Behram-begovoj medresi su boravili profesori i učenici iz pobratimske medrese Aziz Bajraktar iz Istanbula. U ovom periodu u prijepodnevnim satima prisustvovali su nastavi, a u slobodno vrijeme obilazili su znamenitosti i učili o bogatoj historiji Bosne i Hercegovine. Posjeta je iskorištena za obilazak centra Tuzle i posjetu Turali-begovoj džamiji, biblioteci Behram-beg, Memorijalnom centru Kapija i Čaršijskoj džamiji. U srijedu 9.4.2025. godine obišli su Memorijalni centar Potočari i posjetili su džamiju na Kušlatu, a u povratku su predahnuli na prelijepom Diviču. U utorak 15.4. obišli su Srebrenik i poznatu srednjovjekovnu Gradinu, a u Gradačcu su se upoznali sa bogatom historijom grada i obišli su Kulu Husein-kapetana Gradaševića. Posjeta ovom dijelu Bosne iskorištena je za odlazak u Bosanski

Šamac i obilazak rodne kuće prvog predsjednika Bosne i Hercegovine Alije Izetbegovića. Izlet na Ilinčicu je realizovan u srijedu 16.4. a posjeta Sarajevu u četvrtak 17.4. 2025. godine. Ovom prilikom su posjetili Baščaršiju, Muzej Alija Izetbegović i Tunel spasa. Slobodno vrijeme tokom boravka u našoj školi proveli su u druženju sa učenicima i sportskim aktivnostima, a preko vikenda su boravili u porodicama naših učenika.

Još jednom se pokazalo da ova posjeta izgrađuje i jača vezu između dvije škole, te pruža priliku za stjecanjem novih prijateljstava i učvršćivanjem veza između učenika.

Lejla Baturić se plasirala na državno takmičenje iz fizike

U subotu 12.4.2025. godine na Prirodno-matematičkom fakultetu Univerziteta u Sarajevu održano je XXIX federalno takmičenje iz fizike za učenike srednjih škola. Učestvovalo je 118 takmičara iz cijele Federacije Bosne i Hercegovine.

Ranije su se na kantonalnom takmičenju iz Behram-begove medrese plasirala četiri učenika u dvije kategorije. Iz oblasti Mehanika i termodinamika bila su tri takmičara. Hamza Osmanović zauzeo je četvrto mjesto, Harun Ahmić peto, dok je Ensar Hamidović zauzeo dvanaesto mjesto. Iz oblasti Cjelokupna fizika Lejla Baturić zauzela je četvrto mjesto i ovim rezultatom se plasirala na državno takmičenje (BH olimpijadu) iz fizike, koje će se održati 26. aprila 2025. godine u Banjoj Luci.

U izuzetno jakoj konkurenciji naši učenici su pokazali da smo na samom vrhu kada je izučavanje fizike u pitanju, a iza ovakvih rezultata su mjeseci priprema i odricanja. Učenike je pripremao profesor fizike u našoj školi Dino Ćorović.

Organizatori takmičenja su Društvo fizičara Federacije Bosne i Hercegovine i Prirodno-matematički fakultet Univerziteta u Sarajevu.

Učenici iz Istanbula na prijemu kod muftije Fazlovića

Profesori i učenici iz medrese Aziz Bajraktar iz Turske, bili su u ponedjeljak 14. aprila na prijemu kod muftije tuzlanskog Vahid-ef. Fazlovića.

Prijemu su prisustvovali direktor Behram-begove medrese Admir Muratović, profesor u našoj školi hfz. Muamer Kadrić i sekretar Muftijstva tuzlanskog Muhamed Hasanspahić.

Učenici iz medrese Aziz Bajraktar borave u našoj školi od 7-21.4.2025. godine u okviru programa razmjene učenika Partnerstvo medresa.

Tribina povodom Dana Armije Republike Bosne i Hercegovine

U Bosanskom kulturnom centru u Tuzli u srijedu 16.4.2025. godine održana je tribina posvećena 15. aprilu Danu Armije Republike Bosne i Hercegovine. Na tribini se obratio direktor Behram-begove medrese Admir Muratović, koji je istakao značaj ovakvih tribina za edukaciju mladih o historiji naše domovine. U programu je učestvovao i hor naše škole.

O značaju i naslijeđu Armije RBiH govorili su major Harun Hodžić, dobitnik priznanja zlatni ljiljan Edin Haračić-Klej i Dževad Ikanović Ozrenac, maloljetni borac Armije Republike Bosne i Hercegovine. Njihove poruke bile su usmjerene na očuvanje istine o odbrambeno-oslobodilačkom ratu i važnosti prenošenja istine na mlade.

Tokom tribine promovisana je knjiga Zalog za domovinu, autora Haruna Hodžića, koja donosi 33 ratne priče boraca Armije RBiH i pripadnika MUP-a.

Tribini su prisustvovali učenici Behram-begove medrese.

Organizatori tribine su Behram-begova medresa i Medžlis Islamske zajednice Tuzla.

Lejla Baturić na prijemu kod direktora Muratovića

Prijem kod direktora Behram-begove medrese Admira Muratovića za učenicu četvrtog razreda hafizu Lejlu Baturić i njenu razrednicu Seldinu Halilović i odgajateljicu Senadu Mehmedćehajić upriličen je u srijedu 16.4.2025. godine. Prijemu je prisustvovao i pomoćnik direktora za nastavu Nedžad Vehabović. Direktor Admir Muratović se osvrnuo na uspjehe Lejle Baturić koje je postigla na ovogodišnjim takmičenjima. Pohvalio ju je i istakao njenu posvećenost prema preuzetim obavezama, te je iskoristio priliku da joj čestita na izuzetnim rezultatima koje je ostvarila u ovoj školskoj godini.

Lejla Baturić je od prvog razreda Medrese pokazivala ljubav prema prirodno-matematičkim predmetima i osvajala je izuzetne rezultate iz fizike i matematike na kantonalnim, federalnim i državnim takmičenjima. Kao učenica prvog razreda Behram-begove medrese osvojila je četvrto mjesto na Kantonalnom takmičenju iz matematike i treće mjesto na Kantonalnom takmičenju iz fizike. U drugom razredu bila je kantonalni šampion iz fizike, a iste godine osvojila je drugo mjesto na Federalnom takmičenju, te se plasirala i na Državno takmičenje iz ovog predmeta. Uz sve ove obaveze u drugom razredu je memorisala cijeli Kur`an i postala hafiza Kur`ana Časnog. U trećem razredu potvrđuje titulu šampiona iz fizike osvojivši prvo mjesto na Kantonalnom takmičenju. Iste godine zauzela je drugo mjesto na Kantonalnom takmičenju iz matematike. Ponovo je potvrdila svoj status šampiona osvojivši prvo mjesto na Federalnom takmičenju iz fizike 2024. godine, te se plasirala se na Državno takmičenje.

U četvrtom razredu nizali su se uspjesi, te je na Kantonalnom takmičenju iz fizike zauzela drugo mjesto, i plasirala se na Federalno takmičenje na kojem je zauzela četvrto mjesto. Sa ovim rezultatom se ponovo plasirala na Državno takmičenje za koje trenutno traju pripreme.

U protekle četiri godine takmičila se iz Sire, Historije, Geografije, Arapskog i Bosanskog jezika, te je redovno išla na takmičenja iz hifza. Uvijek je osvajala izuzetne rezultate. Na jednom takvom koje se održava ove sedmice u Jordanu biće jedini predstavnik naše

zemlje. Kada se vrati u domovinu čeka je izuzetno zahtjevno Državno takmičenje iz fizike.

Našoj hafizi Lejli Baturić želimo mnogo uspjeha u budućnosti, a poznavajući njenu želju za znanjem i upornost koja ju je krasila ove četiri godine ne sumnjamo da će biti svjetionik znanja gdje god da se pojavi.

Susret direktora

Behram-begovu medresu su u petak 18.4.2025. godine posjetili direktor Agencije za certificiranje halal kvalitete Damir Alihodžić i direktor Centra za rehabilitaciju ovisnika o psihoaktivnim supstancama Mevludin Joldić. Bila je ovo prilika za susret sa direktorom Behram-begove medrese Admirom Muratovićem. Razgovarano je o unapređenju saradnje naše škole sa ove dvije ustanove i o novim projektima.

Premijerno izvedena drama "Bašeskija, san o Sarajevu"

U punoj sali Behram-begove medrese u četvrtak 24.4.2025. godine uspješno je izvedena premijera drama Bašeskija, san o Sarajevu. Ova drama je snažna priča o o bosanskim sudbinama koje je Bašeskija vjerno bilježio u svom Ljepotisu. Priča je to o ljubavi dvoje mladih koja ne može biti ostvarena, jer se ratovi i epidemije kuge ponavljaju i sprečavaju ostvarenje čovjekovih životnih snova.

Izveli su je članovi dramskog studija naše škole. Glumili su: Selver Sarajlić kao Bašeskija, Srđan Hodžić kao Fazlija, Lejla Časurović kao Fata, Aiša Mujagić kao Fatina majka Rabija, Eldar Jusić kao Rabijin muž Salko, Sulejman Husejnović kao Avdaga, Lejla Hodžić kao Dubrovkinja i Murat Hajdarević kao telal.

Predstavu je režirala profesorica bosanskog jezika u našoj školi Emina Hatunić.

Lejla Baturić se plasirala na Svjetsku olimpijadu iz fizike

Državno takmičenje učenika srednjih škola iz fizike održano je u subotu 26.4.2025. godine na Prirodno-matematičkom fakultetu u Banjoj Luci. Učestvovala su dvadeset i dva najbolja fizičara iz Bosne i Hercegovine. Među njima bila su dva predstavnika Behram-begove medrese, koji su prethodno učestvovali na Federalnom takmičenju Lejla Baturić i Hamza Osmanović. Naša učenica Lejla Baturić osvojila je peto mjesto i sa ovim sjajnim rezultatom plasirala se na Međunarodnu (Svjetsku) olimpijadu iz fizike (IphO) koja će biti održana u Francuskoj. Ona je četvrti predstavnik naše škole koji se spio plasirati na olimpijadu iz fizike.

Iza ovog sjajnog rezultata su mjeseci priprema, učenja i odricanja. Učenike je pripremao profesor fizike u Behram-begovoj medresi Dino Ćorović.

Održana tribina "Narod koji čita ima budućnost"

Povodom Svjetskog dana knjige i autorskih prava u amfiteatru Behram-begove medrese u ponedjeljak 28. 4. 2025. godine održana je javna tribina Narod koji čita ima budućnost. Izlagači su bili prof. dr. Refik Bulić, prof. dr. Sead Nazibegović i profesorica bosanskog jezika Emina Hatunić. Prof. dr. Refik Bulić je na interesantan način govorio o čitanju i mogućnostima koje pruža umjetna inteligencija. Također je zaključio da mladi nisu izgubili želju za čitanjem, samo su mogućnosti drugačije i da bez obzira na tehnološki napredak savremeni čovjek ne može živjeti bez čitanja.

Prof. dr. Sead Nazibegović govorio je o digitalizaciji i o provjeravanju činjenica koje nam plasiraju na internet. Profesorica Emina Hatunić je počela obraćanje podsjećajući na prve riječi Božije objave Uči, te se u nastavku obraćanja osvrnula na Ummet knjige i na postignuća Bošnjaka kao naroda koji civilizacijski pripada narodu knjige. Istakla je da je sva naša prošlost sačuvana u knjigama i da mladim naraštajima moramo govoriti da se čitanje i obrazovanje isplati.

Moderator na tribini je bio mr. sc. Sead Husić.

Posjetioci su imali priliku pogledati izložbu o Hasanaginici, koju je pripremio Fahrudin Sinanović.

Organizatori tribine i izložbe su Behram-begova medresa, Institut za društvena i religijska istraživanja i Specijalna Biblioteka Behram-beg u Tuzli.

Debata o jedinstvenom obrazovanju i izazovima u Bosni i Hercegovini

Behram-begova medresa bila je domaćin 25. debate učenika srednjih škola koja je održana u utorak 29.4.2025. godine. Prijavilo se četrnaest srednjih škola iz Bosne i Hercegovine, Islamska gimnazija Dr. Ahmed Smajlović iz Zagreba i Medresa Gazi Isa-beg iz Novog Pazara. Tema o kojoj su učesnici raspravljali je Jedinstveno obrazovanje za jedinstveno društvo: Mogućnost ili izazov u Bosni i Hercegovini. Takmičilo se u tri kategorije: govorništvo na bosanskom jeziku, govorništvo na engleskom jeziku, snimanje video spota.

Ovogodišnji pobjednik u govorništvu na engleskom jeziku je Faris Suljić iz Mješovite srednje škole Srebrenik, prvo mjesto u govorništvu na bosanskom jeziku osvojila je Aiša Šutković iz Medrese Gazi Isa-beg iz Novog Pazara. Dok prvo mjesto za najbolji video dijele Mješovita srednja škola Srebrenik i Gimnazija Ismet Mujezinović iz Tuzle.

Svi učesnici su pokazali visok nivo angažiranosti tokom istraživanja i dobro kreirane argumente. Posebno se istakla govornička sposobnost kod takmičara u odbrani svojih stavova.

Cilj ovakvih okupljanja je afirmacija kritičkog mišljenja kod mladih ljudi i afirmacija stava.

Otvorena Behram-begova (Šarena) džamija

U ponedjeljak 5.5.2025. godine otvorena je Behram-begova (Šarena) džamija. Svečanosti otvaranja prisustvovao je reisu-l-ulema Islamske zajednice u Bosni i Hercegovini Husein-ef. Kavazović. On

mladost 1995. godine. Također su obišli lokalitet nekadašnje zgrade Behram-begove medrese na skveru.

Otvaranje Behram-begove je u svom obraćanju istakao značaj očuvanja vakufa i islamske baštine za buduće generacije. Na svečanosti su se obratili zamjenik generalnog direktora Generalne direkcije vakufa Republike Turske Erkan Omeroglu, muftija tuzlanski Vahid-ef. Fazlović, premijer Tuzlanskog kantona Irfan Halilagić. Nakon otvaranja džamije obišli su Kapiju i proučili fatihu za ubijenu tuzlansku džamije je centralna svečanost u okviru manifestacije Dani vakufa u Bosni i Hercegovini. Obnova džamije trajala je sedam godina. Radovi su obuhvatali kompletnu sanaciju temelja, obnovu trijema, oslikavanje unutrašnjosti prirodnim pigmentima, kao i uređenje harema. Ova džamija je spoj lokalne graditeljske tradicije i orijentalne arhitekture. Vraćen joj je izgled iz 16. stoljeća, a kupola iz 1888. godine ponovo dominira tuzlanskim krajolikom.

Ibrahim Kajan u Medresi

Poznati bosanskohercegovački književnik Ibrahim Kajan u utorak 6.5.2025. godine susreo se sa učenicima Behram-begove medrese. Bila je ovo prilika da se druže sa poznatim književnikom i da ga upoznaju kroz književne razgovore koje je sa njim vodio Sead Husić. Povod za susret sa književnikom Kajanom je bila promocija njegove nove knjige „Samo prolaznik, autobiografski fragmenti“, čija promocija je održana isti dan u Biblioteci Behram-beg u Tuzli.

Maturanti posjetili Behram-begovu (Šarenu) džamiju

U srijedu 7.5.2025. godine maturanti naše škole sa svojim odgajateljima posjetili su Behram-begovu (Šarenu) džamiju. Ovaj dan se širom naše domovine Bosne i Hercegovine obilježava kao Dan džamija, kada se prisjećamo srušenih džamija, mekteba, i drugih vakufskih objekata koji su uništeni u Agresiji na Bosnu i Hercegovinu. Bila je ovo prilika da klanjaju akšam-namaz i da pogledaju unutrašnjost rekonstruisane Behram-begove džamije, koja je nakon sedam godina zasjala u raskošnoj ljepoti.

U periodu od 1992-1995. godina u našoj zemlji je srušeno 614 džamija, 218 mesdžida, 69 mekteba, četiri tekije, 37 turbeta i 405 drugih vakufskih objekata.

Održani XVIII Dani porodičnih vrijednosti

Program povodom Dana porodičnih vrijednosti održan je u četvrtak 8.5. 2025. godine u Behram-begovoj medresi. Tema ovogodišnjeg programa bila je Džamija, kuća mira i zajedništva.

Program su izveli učenici Medrese, članovi Recitatorske i Horskse sekcije. Program se sastojao od ilahija, prozних tekstova, recitacija, ajeta i hadisa i dramskog prikaza. Na programu se obratio direktor Behram-begove medrese dr. Admir Muratović koji je govorio o vrijednosti i važnosti džamije u životu muslimana. Programu su prisustvovali majke naših učenica i učenika, profesorice, koordinatorice Odjela za brak i porodicu Muftijstva tuzlanskog i uposlenice tuzlanskih škola.

Terenska nastava u Kamenici

U okviru izborne nastave iz predmeta historija, u ponedjeljak 12.5.2025. godine realizovana je terenska nastava. Učenici koji idu na izbornu nastavu iz ovog predmeta posjetili su Kamenicu. Cilj ove posjete je upoznavanje učenika sa historijskim i kulturnim značajem ovog kraja, posebno u kontekstu savremenih dešavanja i sjećanja na događaje iz bliže prošlosti. Posjetili su dvanaest lokaliteta gdje su bile masovne grobnice. Učenici su imali priliku da kroz predavanja steknu bolje razumijevanje o dešavanjima u period Agresije na Bosnu i Hercegovinu, s posebnim akcentom na ubistva i progon Bošnjaka iz ovog dijela Bosne. Terenska nastava ispunila je svoje edukativne ciljeve i značajno doprinijela proširenju znanja iz perioda bliže prošlosti.

Učenici generacije Lejla Baturić i Selver Sarajlić na prijemu kod direktora

U srijedu 21.5.2025. godine na prijemu kod direktora Behram-begove medrese Admira Muratovića bili su učenici generacije Selver Sarajlić i Lejla Baturić. Oni su svojim trudom, zalaganjem, te učešćem na raznim takmičenjima ostvarili najviše bodova, te su proglašeni učenicima generacije.

Hafiza Lejla Baturić, rođena je 19.05.2006. godine u Tuzli. Završila je Osnovnu školu „Musa Ćazim Ćatić“ u Zelinji Donjoj u Gradačcu, kao učenica generacije. Medresu upisuje 2021. godine. U drugom razredu postaje hafiza Kur`ana Časnog. U ove četiri godine predstavljala je Medresu na raznim takmičenjima. Posebno je naklonjena prema prirodno-matematičkim predmetima i našu školu je predstavljala na kantonalnim, federalnim i državnim takmičenjima iz fizike. Ove godine plasirala se na Olimpijadu iz fizike koja će se održati u Francuskoj. Takmičila se još iz matematike, arapskog i bosanskog jezika, geografije, historije, sire i redovno je išla na takmičenja iz hifza. Bila je aktivna i u žurnalističkoj sekciji tokom svog školovanja.

Selver Sarajlić je rođen 10.8.2006. godine u Tuzli. Svoje osnovno obrazovanje završava u Drugoj osnovnoj školi Živinice kao učenik generacije. Također je završio i Osnovnu muzičku školu u Živinicama. Svoje umjetničke sklonosti razvijao je i kao stalni član Gradskog pozorišta Živinice. Medresu upisuje 2021. godine. U prvom razredu se plasirao na federalno takmičenje iz fizike i matematike. Našu školu je predstavljao na takmičenju iz bosanskog jezika i debate. Istakao se i u vannastavnim aktivnostima. Bio je predsjednik Vijeća učenika Behram-begove medrese, član orkestra, debatne, dramske i recitatorske sekcije.

Maturanti 349. generacije prošetali Tuzlom

U četvrtak 22.5.2025. godine 349. generacija maturanata Behram-begove medrese u svečanoj povorci prošetala je ulicama svoga grada. Maturanti su u pratnji svojih razrednika i odgajatelja krenuli od Behram-begove medrese i prošetali se do Trga Slobode,

a zatim i do Trga prekinute mladosti (Kapije), na mjesto gdje je 1995. godine ubijena tuzlanska mladost. Tu su položili ruže i proučili fatihu. Zatim su krenuli prema Džindić džamiji, gdje su kratko zastali i fatihom se prisjetili svojih profesora koji su ukopani u haremu džamije. Dolaskom do mjesta stare zgrade Medrese i fotografisanjem završena je šetnja 349. generacije Behram-begove medrese.

Ova generacija 349. generacije maturanata Behram-begove medrese broji 128 učenika, 56 učenika i 72 učenice. Razrednici maturantima su bili Asmir Dorić i Ervin Sejdinović, i odgajatelj Bekir Šabić. Razrednice maturanticama su Seldina Halilović i Amila Hansaspahić, a odgajateljica Senada Mehmedćehajić. Ova generacija je iznjedrila jednu hafizu Lejlu Baturić. Brojni su učenici na raznim takmičenjima i na najljepši način predstavljali Behram-begovu medresu. Učenik generacije je Selver Sarajlić, a učenica generacije je Lejla Baturić.

Maturskom akademijom koja će se održati u subotu 24.5.2025. godine, svečanosti ispraćaja i ove generacije Behram-begove medrese bit će završene.

Izašao maturalni Misak

U četvrtak 22.5.2025. godine iz štampe je izašao 114. broj školskog lista Misak. Ovaj broj je posvećen 349. generaciji maturanata Behram-begove medrese i oni su ga priredili. U ovom broju se opraštamo od glavne urednice Amine Pekarić, zamjenice urednice Elmine Hanić i lektorice Misaka Zerine Zambaković. Također, opraštamo se od velikog broja članova redakcije koji su pisali za Misak, redovno prisustvovali sastancima i svojim idejama unaprijedili njegov sadržaj. Neki od njih bili su članovi redakcije od prvog razreda i uprkos ostalim školskim obavezama odvajali su vrijeme za svoj Misak. U ovoj školskoj godini pripremili su izlazak tri broja, a četvrti broj je u pripremi. Posjete izložbama, promocijama knjiga, raznim edukativnim radionicama, posjeta medijima, organizacija Konferencije učeničkih listova samo je mali djelić onoga što su realizovali u proteklom periodu.

Maturalni broj je najčitaniji i najiščekivaniji broj Misaka u školskoj godini.

Štampan je na 60 stranica, a izašao je u 800 primjeraka.

Izložba Kapija "Sjene nekažnjenih zločina"

U petak 23.5.2025. godine u Narodnom pozorištu u Tuzli otvorena je izložba fotografija "Kapija 25.5.1995-25.5.2025., Sjene nekažnjenih zločina" posvećena ubijenoj tuzlanskoj mladosti. Izložba je priređena povodom 30. godišnjice od strašnog zločina, kada je 25.5.1995. godine od ispaljene granate sa Ozrena ubijena 71 mlada osoba. Izložbu je otvorio gradonačelnik Grada Tuzla Zijad Lugavić, a prije otvaranja izložbe obratio se direktor Behram-begove medrese Admir Muratović. Autori izložbe su učenici prvog razreda Behram-begove medrese Imran Imamović, Medina Bajrektarević i Marizela Velagić. Učenike je kroz ovaj projekat vodio i bio mentor Robert Andrejaš, član Asocijacije za umjetničku fotografiju u Bosni i Hercegovini, a koordinator projekta je profesorica Senada Mehmedćehajić. Postavka obuhvata 36 fotografija, koje kroz likovni izraz i dokumentarni pristup svjedoče o zločinu koji je počinjen prije trideset godina.

Održana akademija 349. generacije maturanata Behram-begove medrese

Svečana akademija 349. generacije maturanata Behram-begove medrese održana je u subotu 24.5.2025. godine u Bosanskom kulturnom centru u Tuzli. Program su izveli maturanti, a na najljepši način su se oprostili od školovanja u medresi učeći Kuran, izvodeći ilahije, čitajući recitacije. Na akademiji su se obratili direktor Behram-begove medrese dr. Admir Muratović, izaslanik reisul-uleme muftija sarajevski dr. Nedžad-ef. Grabus, ministar obrazovanja i nauke Tuzlanskog kantona dr. Ahmed Omerović, gradonačelnik Tuzle dr. Zijad Lugavić.

Razrednici su obavili posljednju prozivku svojih učenika. Razrednici maturantima su bili profesori Asmir Dorić i Ervin

Sejdinović, a odgajatelj Bekir Šabić. Maturanticama su razrednice bile profesorice Seldina Halilović i Amila Hasanspahić, a odgajateljica Senada Mehmedćehajić.

Ova generacija broji 56 učenika i 73 učenice. Učenik generacije je Selver Sarajlić, a učenica generacije je hafiza Lejla Baturić. Tokom školovanja postigli su brojne uspjehe u pojedinačnim i ekipnim takmičenjima.

Akademiji su prisustvovali roditelji maturanata, prijatelji medrese, mnogobrojne zvanice iz političkog, obrazovnog i kulturnog života Tuzle. Ove godine akademiji su prisustvovali gosti iz Turske.

Delegacija iz Istanbula u posjeti Medresi

U Behram-begovoj medresi u periodu 23-26.5.2025. godine boravila je delegacija iz Istanbula. Na čelu delegacije bio je kaymakam Sancaktepea (Istanbul) Naif Yavuz. Ostali članovi delagacije bili su direktor istanbulske medrese Aziz Bayraktar Osman Tokur, predsjednik Upravnog odbora Fondacije YECVA Mehmet Keskin, direktor Fondacije YECVA Mehmet Ali Killiç, direktor sektora za društvenu pomoć u Sancaktepeu Şaban Yaliç, pedagog Aziz Bayaktar medrese Hayrullah Bilgin i prijatelj Medrese Özcan Yeniay.

Svoj boravak u Bosni i Hercegovini iskoristili su za obilazak historijskih znamenitosti naše domovine. U petak 23. maja posjetili su Memorijalni centar Potočari. Sutradan su odali počast ubijenoj mladosti na Kapiji, a isti dan 24.5.2025. godine prisustvovali su Svečanoj akademiji 349. generacije maturanata Behram-begove medrese. Nakon toga posjetili su Gradačac i Srebrenik.

U nedjelju 25. maja boravili su u Mostaru, Počitelju, Buni i Sarajevu. Prijem kod direktora Behram-begove medrese Admira Muratovića bio je u ponedjeljak 26.5.2025. godine. Posjeta Sarajevu je realizovana isti dan i ovom prilikom su posjetili Internacionalni univerzitet u Sarajevu. Rektor IUS-a dr. Ahmet Yildirim primio je uvažene goste iz Turske, a prijemu su prisustvovali i direktor Behram-begove medrese Admir Muratović i pomoćnik direktora za nastavu Nedžad Vehabović. Nakon toga su obišli Memorijalni centar Kovači i mezar prvog predsjednika Republike Bosne

i Hercegovine Alije Izetbegovića. Bila je ovo izuzetno značajna posjeta delegacije iz Istanbula, koja bi trebala učvrstiti prijateljske odnose između Behram-begove medrese i pobratimske škole Aziz Bayraktar iz Istanbula.

Sjećanje na Musu Ćazima Ćatića

U utorak 27.5.2025. godine u Behram-begovoj medresi je obilježeno 110 godina od smrti velikana bosanskohercegovačkog pjesništva Muse Ćazima Ćatića. Program su pripremili učenici trećeg razreda Medrese, članovi Dramskog studija i Recitatorske sekcije. Učenici su govorili o Ćatiću i njegovoj poeziji, uz izvedbu dramske skice Zejčira Hasića Fes na čiviluku, te uz recitovanje Ćatićevih pjesama.

Naš proslavljeni pjesnik rodio se 12. marta 1878. godine u Odžaku. Poetski prostor koji je oblikovao postao je temeljom modernog bošnjačkog pjesništva. Napisao je ciklus pjesama O ženi, a najpoznatije pjesme su: Teube nesuh (Pokajanje jednog grijешnika), Ja nijesam sanjar, Ramazanski kandilj, Pred smrt. Musa Ćazim Ćatić je preselio 6. aprila 1915. godine, kada je imao svega 37 godina.

Direktor Muratović održao hutbu u Potočarima

U džematu na musali u Memorijalnom centru Potočari u petak 30. maja hutbu je održao i namaz predvodio direktor Behram-begove medrese Admir Muratović. Govorio je o čuvanju rodbinskih veza, posebno u kontekstu potreba današnjeg vremena u kojem je sve izraženija pojava otuđenosti među ljudima.

Na namazu su bili uposlenici Memorijalnog centra, zatim uposlenici Međunarodnog foruma solidarnosti Emmaus i drugih institucija koje djeluju u Potočarima kao i gosti koji su došli da odaju počast žrtvama.

Seminar za profesore engleskog jezika održan u Medresi

U periodu 31-01.06.2025. godine, Behram-begova medresa je domaćin 14. međunarodnom seminaru za profesore engleskog jezika Tuzla English Language Teaching Seminar (TELTS) 2025.

Svečanosti otvaranja seminara prisustvovali su predstavnici svih partnerskih institucija: direktor Behram-begove medrese u Tuzli Admir Muratović, ataše za kulturu i obrazovanje u Američkoj ambasadi u Sarajevu Catherine Fischer, ministar obrazovanja i nauke Tuzlanskog kantona Ahmed Omerović, direktorica Regionalnog ureda za programe engleskog jezika (RELO) u Američkoj ambasadi u Beogradu Frances Westbrook, ekspert za kulturu i obrazovanje u Američkoj ambasadi u Sarajevu Elizabeta Delić. Prije svečanosti otvaranja, muftija tuzlanski Vahid-ef. Fazlović i direktor Medrese Admir Muratović su primili predstavnike Ambasade Sjedinjenih Američkih Država u Bosni i Hercegovini i Regionalnog ureda za programe engleskog jezika i zahvalili im se na dugogodišnjoj saradnji na ovom značajnom seminaru kao i drugim edukativnim programima koji se održavaju u Behram-begovoj medresi u Tuzli

Svi prisutni su izrazili zadovoljstvo organizacijom 14. po redu Seminara za profesore engleskog jezika u Bosni i Hercegovini, kao prilici da se doprinese kvalitetnijem obrazovanju mladih ljudi, i da na tome treba istrajati kako bi ti mladi u budućnosti bili lideri i inicijatori promjene u svojoj zajednici i društvu u cjelini.

Ovogodišnji TELTS program posebno posvećuje pažnju razvijanju vještina koje su potrebne nastavnicima i njihovim učenicima da ispune zahtjeve modernog obrazovanja i općenito života u 21. stoljeću. Posebno se stavio naglasak na interdisciplinarnoj nastavi i međupredmetnom povezivanju sadržaja učenja (didaktički pristup koji stavlja učenika u središte nastavnog procesa s ciljem optimizacije učenja i dubljeg razumijevanja sadržaja), kroz kreativne aktivnosti i STEM/prirodno-naučne teme u nastavi engleskog jezika, kako bi se pomoglo učenicima da razviju svoje kreativne i tehničke vještine, vještine rješavanja problema i kritičko mišljenje

Naša škola je domaćin ovom prestižnom programu stručnog usavršavanja četrnaestu godinu u kontinuitetu, a organizira ga u saradnji s Ambasadom Sjedinjenih Američkih Država u Bosni i Hercegovini, uz podršku Muftijstva tuzlanskog, Ministarstva obrazovanja i nauke Tuzlanskog kantona, Pedagoškog zavoda Tuzlanskog kantona, Univerziteta u Tuzli, te uz podršku Regionalnog ureda za programe engleskog jezika (RELO) sa sjedištem u Beogradu. Do sada je ovaj vid stručnog usavršavanja pohađalo više stotina nastavnika osnovnih i srednjih škola i univerziteta iz Bosne i Hercegovine.

Završena studijska razmjena učenica

U Behram-begovoj medresi je u periodu 19.5.-02.06.2025. godine boravila grupa učenica sa profesoricama iz pobratimske škole Rabia Kiz Anadolu Imam Hatip Lisesi iz Istanbula. One su u ovom periodu u prijepodnevnim satima prisustvovalе nastavi, a u slobodno vrijeme su obilazile historijske znamenitosti Bosne i Hercegovine. Obišle su centar Tuzle i Turali-begovu džamiju, posjetile su biblioteku Behram-beg, Memorijalni centar Kapija. Obišle su Memorijalni centar Potočari, Sarajevo, Mostar, Srebrenik, Gradačac, Bosanski Šamac, Tešanj, Travnik i Jajce. U slobodno vrijeme imale su sportske aktivnosti, realizovan je izlet na Zlaću, prisustvovalе su kreativnim radionicama i družile su se sa našim učenicama. Također su bile na maturalnoj šetnji i Svečanoj akademiji 349. generacije maturanata. Preko vikenda su boravile u porodicama naših učenica.

Ova razmjena učenica realizuje se u sklopu projekta Partnerstvo medresa. Naše učenice su u januaru boravile u Istanbulu i učile su turski jezik i posjećivale historijske znamenitosti Turske. Ovo je izuzetna prilika da kroz razmjenu iskustava i obilaske Bosne i Hercegovine nauče o našoj kulturi, jeziku i gostoljubivosti bosanskog čovjeka.

Sjećanje na Srebrenicu kroz objektiv mladih fotografa

U srijedu 11.6.2025. godine u Umjetničkoj galeriji Bosanskog kulturnog centra Tuzlanskog kantona otvorena je izložba fotografija pod nazivom 30 godina od genocida u Srebrenici (11.7.1995-11.7.2025.) u organizaciji Behram-begove medrese. Izložbu je otvorio direktor Behram-begove medrese Admir Muratović. Autori izložbe su učenici prvog razreda Medrese Imran Imamović, Medina Bajrektarević i Marizela Velagić. Oni su kroz objektiv fotoaparata prikazali lični i kolektivni odnos prema sjećanju na genocid počinjen u Srebrenici. Mentor učenicima tokom rada bio je Robert Andrejaš, član Asocijacije za umjetničku fotografiju u Bosni i Hercegovini i kandidat za majstora fotografije. Koordinaciju projekta vodila je profesorica u Behram-begovoj medresi Senada Mehmedćehajić. Ova izložba je izuzetan doprinos mladih u očuvanju kulture sjećanja i očuvanju istine za buduće naraštaje.

Sportski dan na izletištu Muška voda

U sklopu realizacije godišnjeg plana i programa u četvrtak 12.6.2025. godine na izletištu Muška voda u Kladnju organizovan je sportski dan za učenike Behram-begove medrese. Bila je ovo prilika za druženje, sportsko nadmetanje i opuštanje u prelijepom ambijentu zaštićenog prirodnog pejzaža planine Konjuh

Nakon nekoliko godina učenici Medrese su se vratili na ovo prelijepo izletište, udaljeno od Tuzle 62 km, a koje uz sportske terene i bazen nudi posjetu pećini Bebrava, obilazak Paučkog jezera, čist planinski zrak, brze planinske rječice, šetnju kroz gustu četinarsku šumu i druge sadržaje, idealne za ovu vrstu aktivnosti.

Strateško planiranje u obrazovanju

Edukativno predavanje na temu Strateško planiranje u obrazovanju održano je u srijedu 5.2.2025. godine u Behram-begovoj medresi. Predstavnicima menadžmenta medresa obratili su se direktor Behram-begove medrese dr. Admir Muratović i muftija tuzlanski Vahid-ef. Fazlović. Muftija Fazlović je ukazao na značaj

okupljanja medresa s ciljem razmjene iskustava koja će koristiti prilikom definiranja budućih pravaca djelovanja.

Edukatori su bili prof.dr. Dženan Kulović i prof.dr. Nino Serdarević. Oni su nakon prezentacije strateških odrednica vodili učesnike kroz razradu strateških ciljeva. Ovo je četvrta od pet predviđenih sesija edukativnog seminara. Naredna će služiti za zaokruživanje ovog procesa, koji je pokrenula Uprava za obrazovanje i nauku u saradnji s Centrom za obuku i kadrove Rijaseta Islamske zajednice.

Ova aktivnost ima za cilj postaviti temelje za dugoročni razvoj medresa i gimnazija Islamske zajednice u Bosni i Hercegovini, uz kontinuiranu analizu obrazovnih strategija.

Susret direktora travničke i tuzlanske medrese

U srijedu 9.4.2025. godine Elči Ibrahim-pašinu medresu u Travniku posjetio je direktor Behram-begove medrese Admir Muratović. Sa njim su bili njegovi saradnici sekretar naše škole, Sevret Mehmedčehajić i profesor informatike Elvedin Kozarević. Na prijemu kod direktora Kemala Avdagića razgovarano je o saradnji između dvije škole.

Završen ciklus predavanja "Na put Gospodara svoga mudro i lijepim savjetom pozivaj"

U Behram-begovoj medresi završen je prvi ciklus predavanja za učenike Na put Gospodara svoga mudro i lijepim savjetom pozivaj, koji je trajao od 14. aprila do 16. juna 2025. godine. Predavanja su se održavala sedmično u džamiji Medrese, a predavači su bili hfz. Mirnes Spahić, profesor Idriz Memić, hfz. Amir Hodžić, hfz. Nedžad Vehabović, hfz. Asmir Imamović, hfz. Abdullah Kapo, Mehmedalija Čandić, hfz. Muamer Kadrić i mr. Bekir Šabić. Neke od tema bile su: Međuljudski odnosi, Šta je u mom srcu, Svjetlo i tama kao moralne orijentacije u Kur'anu, Stid, Muhammed, a.s., kao prijatelj, Mladost u pokornosti Allahu.

Ova predavanja su održana kako bi se podigla svijest kod učenika o važnosti moralnih vrijednosti i međuljudskih odnosa u svakodnevnom životu.

Posjeta gradu na Dravi

Nagrada ekskurzija za učenike Behram-begove medrese koji su tokom školske 2024/2025. godine učestvovali na takmičenjima i ostvarili zapažene rezultate realizovana je u utorak 17.6.2025. godine. Tokom boravka u Osijeku učenici su imali priliku upoznati se sa historijskim znamenitostima ovog grada, posjetiti gradski zoološki vrt, kao i vjerske objekte mesdžid i katedralu. Učenicima se obratio i glavni imam Medžlisa islamske zajednice u Osijeku Senad-ef. Hevešević koji je učenicima ponudio bitne informacije o najvećem gradu u Slavoniji i kulturno-vjerskom životu muslimana u ovom području Hrvatske.

Sportska i žurnalistička sekcija u posjeti Crnoj Gori

Od 20-22.6.2025. godine sportašice i članovi Žurnalističke sekcije Behram-begove medrese boravili su u Podgorici. Bila je ovo prilika za obilazak glavnog grada Crne Gore i upoznavanje sa bogatom historijom ove prijestolnice. U nedjelju 22. juna posjetili su Bar. Obišli su Stari grad i posjetili Omerbašića džamiju, Islamski kulturni centar u Baru, a nakon toga prošetali su ulicama ovog prelijepog grada smještenog na obali Jadranskog mora.

Bila je ovo nagradna ekskurzija za sportašice naše škole i za članove žurnalističke sekcije.

Mehmedalija Čandić ispraćen u penziju

Dugogodišnji pomoćnik direktora za učenički dom, Mehmedalija Čandić ispraćen je u zasluženu penziju u ponedjeljak 23. juna. U svečanom dijelu sjednice Nastavničkog vijeća obratio se direktor Behram-begove medrese Admir Muratović. On je u svom obraćanju rekao da je medresa za upravnika Mehmedaliju Čandića bila drugi dom, te da se on u svakom trenutku trudio da doprinese

njenom razvoju. Posebne riječi zahvalnosti uputio je direktor Behram-begove biblioteke dr. Ahmed Hatunić, koji je kazao da je upravnik Čandić bio uključen u sve projekte i da je sve pomno nadgledao i pratio, te da je on kao tadašnji direktor imao priliku učiti od njega. Muftija tuzlanski Vahid-ef. Fazlović je istakao da je Mehmedalija Čandić radio u veoma izazovnom vremenu i da će ostati upamćen kao neko ko je došao u teško vrijeme za naš narod i u tom periodu smo ga zvali upravnik i ostaće prepoznatljiv kao takav; rekao je muftija Fazlović.

Na kraju se obratio i Mehmedalija Čandić rekavši da je imao sreću što je radio sa tadašnjim direktorom Behram-begove medrese dr. Vahid-ef. Fazlovićem, zatim sa dr. Ahmedom Hatunićem i sada sa novim direktorom dr. Admirom Muratovićem, jer su to ljudi koji imaju viziju. Ovo je kolektiv kojeg moramo čuvati, istakao je na kraju svog obraćanja Mehmedalija Čandić.

Pomoćnik direktora za učenički dom Mehmedalija Čandić došao je u Behram-begovu medresu ratne 1994. godine. Zajedno sa prvim menadžmentom učestvovao je u ponovnoj izgradnji i proširenju kompleksa Medrese, te u organizaciji učeničkog doma. Budno je nadzirao sve aktivnosti, ali i vodio računa o tehničkom osoblju čiji je broj rastao sa proširenjem broja učenika. Zahvaljujući njegovoj predanosti poslu uspješno su realizovane razne aktivnosti. Dan kasnije, 24. juna u prostorijama Medrese održan je i poseban ispraćaj kojem su prisustvovali sadašnji i penzionisani uposlenici tehničkog osoblja Medrese, koji su se uz riječi zahvalnosti oprostili od upravnika Čandića.

Maturalni dan 2025

Svečani program promocije maturanata medresa i gimnazija Islamske zajednice u Bosni i Hercegovini održan je u srijedu 25. juna 2025. godine u biblioteci Gazi-Husrev beg. Programu su prisustvovali direktori medresa i gimnazija, profesori, razrednici, odgajatelji, učenici generacije i odlični učenici. Na svečanosti su učenicima generacije dodijeljena priznanja, a poruku učenika generacije uputila je hafiza Lejla Baturić, učenica generacije Behram-begove

medrese. Priznanja je uručio dekan Fakulteta islamskih nauka u Sarajevu dr. Mustafa Hasani, kao izaslanik reisul-uleme. On je u svom obraćanju rekao da maturalni dan ima posebnu simboliku i značaj, jer medrese daju društvu kvalitetno obrazovane i odgojene mlade ljude. Izvođenjem ilahija program su uveličali članovi hora Medrese Osman-ef. Redžović iz Visokog.

Prije svečanosti u Gazi Husrev-begovoj biblioteci za maturante i maturantice, direktore srednjoškolskih ustanova Islamske zajednice, razrednike i odgajatelje tradicionalno je organiziran prijem na Fakultetu islamskih nauka. Maturantima se obratio dr. Zuhdija Hasanović, a prijem za direktore i profesore organizovan je kod dekana FIN-a dr. Mustafe Hasanija.

Prema podacima Uprave za obrazovanje i nauku ukupno 2911 učenika pohađalo je medrese u školskoj 2024/25. godini, a gimnazije 549 učenika. Ove školske godine medrese je završilo 658 učenika, a gimnazija 134 učenika.

Svečani program Maturalni dan 2025 je organizovala Uprava za obrazovanje i nauku Rijaseta Islamske zajednice u Bosni i Hercegovini.

Održana projekcija filma Liplje-povratak u slobodu

U amfiteatru Behram-begove medrese u ponedjeljak 7. jula održana je projekcija dokumentarnog filma *Liplje-povratak u slobodu*, autora Avde Huseinovića. Direktor Behram-begove medrese Admir Muratović obratio se prisutnima. Producent dokumentarnih filmova Alija Gluhović Brkanić pričao je o filmu rekavši da je ovo svojevrsna premijera film, jer je zvanična premijera prekinuta, zbog iznenadnog prekida električne energije u selu Liplje, zbog čega je obustavljeno prikazivanje filma. Projekciji filma prisustvovali su muftija tuzlanski Vahid-ef. Fazlović, glavni imam MIZ Tuzla Ahmed Huskanović, direktor Instituta za društvena i religijska istraživanja Šefko Sulejmanović, direktori javnih institucija, porodice žrtava, preživjeli logoraši.

Film *Liplje-povratak u slobodu* je dokument o jedinom oslobođenom logoru tokom Agresije na Republiku Bosnu i Hercegovinu. Logor se nalazio na području općine Zvornik kojeg su 25. maja 1992.

godine uspostavile srpske vojne snage zajedno sa jedinicom Beli orlovi iz Službe državne bezbjednosti Srbije. Logor je bio smješten u jednoj kući, a pored nje korišteno je još nekoliko objekata u kojima su ljudi mučeni, zlostavljani, ubijani. Logor je oslobođen 2. juna 1992. godine u akciji pripadnika Teritorijalne odbrane.

Seminar za odgajatelje i pedagoge održan u Mostaru

Seminar za odgajatelje i pedagoge angažovane u medresama Islamske zajednice u Bosni i Hercegovini održan je u utorak 26.8.2025. godine u Karađoz-begovoj medresi u Mostaru. Prisutnima su se obratili direktor Karađoz-begove medrese Aid Tulek i voditelj Odjela za srednje obrazovanje Seid Eminović. Prof.dr. Adnan Tufekčić održao je predavanje na temu Kreativno-metodički i odgojni pristup u radu sa učenicima. O temi Priprema i implementacija radionica i Timski rad govorio je Valdet Peštalić.

Organizator seminara je Uprava za obrazovanje i nauku Rijasetu Islamske zajednice u Bosni i Hercegovini.